



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 10 Yangia anidakangma : Tir Yimyim tiryimyim@aolima tir yimyim TAPAK 8

ICC award atema Jasprit Bumrah züngoksemogo

Japan nung Taro Kono-i PM Suga melentsü teimla angur



VOL. XVIII NO. 325 (ADOK 325) DIMAPUR

SANGTENNÜ (TUESDAY)

RONGJUI (SEPTEMBER) 07, 2021 ₹ 5.00

## Dimapur nung Oct nungi MVAA 2019 mapa küma tenzüksü

**Dimapur, September 6, 2021 (TYO):** Dimapur district nung October ita nungi Motor Vehicle Act mapa küma tenzüksü.

Nagaland sorkari Motor Vehicle Amendment Act 2019 ajanga Motor Vehicle Act 1989 yanglushi aser iba osangji November 12, 2020 sangokja liasü.

Hombarnü Dimapur traffic police-i nübortem dang Motor Vehicle Amendment Act 2019 meteta alitsü ashiba den külemi October ita nungi mapa küma tenzüksü indang osang metetdaksü.

Dimapur traffic police-isa nübortem dang Dimapur police indang official Facebook aser Twitter handle sülen anidaksü

mepishia metetdaksü. Supreme Court-i May 4, 2012 nungi linük nung gari ajak nung safety glasses, windscreens aser side glasses nung 'visual light transmission percentage' mamshitsü tenokdangba agütsüogo, ta Dimapur police-isa ashi.

Anungji, police-i garitem nung 'black films' agientsü aser Motor Vehicle Rules nung Rules 92 aser 100 nunga aliba ama gari kiburtem penalize/challan asütsü, ta parnokisa ashi.

Dimapur district nung tinted glasses mesüra black films enoka den ozüngi memelaba flasher lights mesüra blinkers amshiba mita reprangtsü, ta Dimapur traffic police-isa ashi.

## COVID-19 Nagaland: Nisung 32 dak putet, 5 asü

**Kohima, September 6, 2021 (TYO):** Hombarnü Nagaland nung nisung 32 dak COVID-19 aliba puteta nisung ajak agi 30,388 kümogo aser COVID-19 puteta alir nisung 5 asüba züngsema tasür 631 kümogo.

"Tesüba ghonda 24 tsüngda nisung 32 dak COVID-19 putet. Parnokji Mokochung nung 13, Dimapur nung 10, Kohima nung 4, Mon o Peren nung anana (2) aser Zunheboto nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang COVID-19 puteta alir nisung 44 taneptsü angu. Parnokji Mokochung nung 16, Dimapur nung 11, Kohima nung 10, Longleng nung 5 aser Mon o Peren nung kaka (1) lir" ta paisa metetdaksü.

Tanü taneptsü angur züngsema nisung 28,128 taneptsü nguogo aser ibaji 92.56% lir. Tang nisung 712

anepaludar, ta Dr Kikon-isa shisem.

Hombarnü COVID-19 puteta alir nisung 5 asü. Parnokji Dimapur nung 5 aser Kiphire, Kohima o Peren nung kaka liasü. Parnok züngsema tasür ajak agi 631 kümogo.

"Deobar tashi nung nisung 661,295 nem COVID-19 vaccine indang dose 879,559 agütsüogo" ta State Immunization Officer, Dr Ritu Thurr-i ashi.

Vaccine agirtemji frontline workers 60,854, healthcare workers 15,992, arishi küm 45 193,638 aser arishi küm 18 nungi 44 tsüngda alir 390,811 lir, ta paisa ashi.

"Vaccine agirtem rongnungi nisung 218,264-i dose anaprong agiogo. Parnokji frontline workers 44,656, healthcare workers 12,973, arishi küm 45 ser temapur 116,710 aser arishi küm 18 nungi 44 tsüngda alir 42,925" ta Dr Thurr-isa metetdaksü.

## DES-i social statistics training agir



**Kohima, September 6, 2021 (TYO):** Directorate of Economics and Statistics, Nagaland-i statistical staff atema anogo pungunü indang training ka tenzükogo.

Department tajungba kümdaksütsü atema sentong tajungtem ayonga agir aser iba ajanga statistics tejangja aser shitak agütsütsü, ta DES Additional Director & HoD, Neidilhou Angami-i ashi.

"Economics and Statistics department ya Nagaland nung statistics atema tongti department lir. Anungji ajaki amalitepa mapa takok ngua inyaksüla" ta

Neidilhou-i ashi. "Statistical staff dang training nungi tajangzük ngua angazüksü aser data balala bedanga inyaka aotsüla. Iba training programme ya kanga tongtipang lir kechiyong iba nung population, gender, health, disaster, employment, income & investment onüktem dena lir" ta paisa ashi.

Iba sentong nung mendenji Deputy Director & Programme Officer (Training) Kezhalehou Solo liasü aser pai ashiba agi Kohima, Dimapur, Wokha, Mokochung, Kiphire aser Directorate nungi statistical staff 40-i training nung adener.

## 2030 tashi nung Nagaland nung mapa manguba khuret agientsü

### Küm 10-15 tsüngda Naga lanurtemi aayangi arurtem melenzüksü

**Kohima, September 6, 2021 (TYO):** Linük nung mapa mangur lanur teimtiba alibaji Nagaland state lir aser iba jagi state sorkari 2030 küm tashi nung mapa aika adoka lanurtem inyakkaksütsü alizüngtem lir.

2030 tashi nung sorkari lanurtem asoshi skill development aser entrepreneurs ajungkettsü sentongtem renema lir, ta Nagaland SDG Vision 2030 nung shia lir.

"Nagaland nung nisung teimba mapa inyakbaji sorkar mapatem lir. Private sector, industry aser factory nung mapa inyakkak maliba ajanga state nung mapa manguba khuret ulura lir" ta Vision Document nungsa shia lir.

Iba atema state sorkari 2030 küm tashi nung tetsürtemia mapa talila inyaksü aser tetsür entrepreneur indang start-ups ajungkettsü alizüng yua lir.

Sorkarisa skilled labour force teimba kümdaksütsü aser social security and welfare schemes den külemi Micro Small and Medium Enterprises (MSMEs) teimba kümdaksütsü ta sorkarisa ashi.

State sorkari agriculture sector nung shilem agiba nisung 25,000 aser loin loom weavers 15,000 atema skill certification programme agitsü sentong lir.

Nagaland sorkarisa North Eastern states & Sikkim atema 'Enhancing Skill Development Infrastructure' kübok district 4 nung Industrial Training

Institutes (ITIs) tasen pezü lapoktsü.

State sorkari alizüng atongtsü atema tayongzükba tongtipang pungu ajitetogo. Itemji Limited Training Centres, Poor Infrastructure, Low Industry Interface, Limited Awareness aser High Unemployment Rate lir.

Sorkari mapa balala atema multi-skilled persons ama lanur 200 tashi anitetsü sentong lir.

Nagaland sorkarisa Recruit, Train and Deploy (RTD) model inyakyim nung construction industry nung nungdakattem peritsütsü atema mapa inyaksü aser iba model kübok lanur 250 nem training agütsütü.

Nagaland nungsa World Skills India jenjang nung School of Excellence (SOE) lapoktsü aser lanur lennirtem anitetsü. Iba atema school ka shimtsü aser ibaji World Skills India School of Excellence kümdaksütsü. Iba mapa ya state sorkar aser National Skill Development Corporation (NSDC) yaritepa inyaksü, ta Vision Document nungsa shia lir.

Nagaland nung lanurtem mapa angutsüba construction sector ka lir ta ajiteta Nagaland Building and other Construction Workers (NBOCW) Bureau tentetsü. Department of Labour, Government of Nagaland-i iba Bureau tentetsü sentong

atong. Parnoki 2030 tashi nung Naga lanur 15,000 nem training agütsür, taruba küm 10 nungi 15 tsüngda tangalen nungi aayangi arurtem ajak melenzüksü alizüng lir.

Nagaland sorkarisa Tourism ajanga mapa manguba khuret agientsü sentong lir. Iba asoshi Village Tourism Development Board tentetsü aser parnoki village level nung nübortem yaritsü aser tourism mapa ketdangsa inyaksü.

Department of Sericulture-ia Plantation & silkworm rearing ajungekettsü aser silkworm metsüa tajangzük angutsü atema nübortem ajungmesotsü sentong lir. Parnokisa district ajak nung Silkworm Seed Multiplication Centres lapoktsü.

Nagaland nung 'minimum wage' ya linük nung tajemtiba lir. Tanü shishilembaba jenjang den kechisarena nung jenjang atuba ajanga nisung ka mesüra kibong ka taküm libaliroa aotsü kanga tasak kümogo. Iba jagi state sorkari minimum wage rate jungjunga reprangshimtsü ta Vision Document nungsa shia lir.

2023 tashi nung Nagaland Bio-Resource Mission-i medicinal & aromatic plants ajungkettsü atema Ministry of Micro, Small and Medium Enterprise, GoI den yaritepa technology centres lapoktsü sentong lir, ta Vision Document nungsa shia lir.

## NFHRCC-i yariteper ajak dang pelaba metetdaksür

### Tanü senden nung lungkak aittsüba atema jembitsü

**Dimapur, September 6, 2021 (TYO):** September 7, 2021 nü Foothills road atema senden ka amentsü ta Nagaland Foothill Road Coordination Committee (NFHRCC)-i tanü nenshia metetdaksüogo.

NFHRCC base office, Kher Mahal, Dimapur nung nikongdang 3:00 ako nung sendenji amentsü. Iba ya September 3, 2021 nü lemtetba lir aser September 13,

2021 nungi mapang telatet makai lungkak aittsüba indang onüktem jembitsü, anungji sendaka alirtem aser yaritepertem ajak adentsü pelashishia jaoker, ta NFHRCC-i ashi.

NFHRCC-isa Dimapur nung amenoka aliba kin hohotem dang pelaba metetdaksüogo. Ao Senso Telongjem Dimapur (ASTD), Chang Union, ENPO, Konyak Union, Khaimniungam

Union, Apex Lotha HOHO Wokha, Phom Union, Sangtam Union, Western Sumi HOHO, Western Yimchunger Union, Northern Sumi HOHO, CNSA, DAYO, Phom Students' Union aser Zeliang Students' Union teloktemi NFHRCC-i Nagaland state sorkar nem ita ka atakzüksüba nung pusema nungitba atema pelar, ta ketdangpurtemi ashi.

## Nagaland sorkar department nung nisung shimokba mapa anena atatsü

**Dimapur, September 6, 2021 (Agencies):** Gauhati High Court, Kohima Bench-i tetuyuba agütsüba sülen Nagaland sorkari Hombarnü department tem dang nisung shimokba maparen anena atatsü metetdaksüogo.

Nagaland sorkari department ajak dang iba tetuyuba sülen

anidaksü metetdaksü.

Personnel and Administrative Reforms department-i July 16 nü department 76 nem departmental exams agitsü temelaba agütsü saka August 31 nü Rising People's Party (RPP)-i High Court nung iba telemtetba anema PIL ka benok.

RPP-i PIL agütsüba nung

sorkari sangdong agütsüba meyipa agitsü aser Nagaland Staff Selection Board (NSSB) mapa küma tenzüksü shia liasü. Iba nung ajemdaker Gauhati High Court, Kohima Bench-i sorkar dang department balala nung nisung shimokba maparen meinyaki atatsü tetuyuba agütsü.

## Nagaland nung yangluba oset alimai sapur: Governor Ravi



Dr. Imkongliba Ao Hall, Raj Bhavan Kohima nung September 6, 2021 nü Nagaland nung yangluba oset nung GI tag asüba, "Naga Tree Tomato" indang Special Cover sayaba mapang Governor RN Ravi den Department of Posts nungi ketdangsürtem külemi tangokba noksa ka yangi angur.

### Dimapur, Rongjui/Sept. 06

(TYO): Nagaland Governor R.N. Ravi ajanga "Naga Tree Tomato" indang Special Cover ka Dr. Imkongliba Ao Hall, Raj Bhavan, Kohima nung September 6, 2021 nü saya liasü, koba Nagaland nung yangluba Geographical Indication (GI) tag ka alitsü.

Tongtipang tatalokba mesüra tongtipang osettem tali metetdaksütsü mechi Department of Posts ajanga iba amala Special Covers ya sayar. Department ajanga North East nung adokba GI product 19 indang Covers tem sayaogo. Taoba ita "Naga Mircha" aser "Chakhesang Shawl" indang

Special Cover ana sayaogo.

Department of Posts ajanga temolung agütsüba aser mapa tajung inyakba atema Governor-i pelaba lemsatep aser GI tagging yagi oset tejangjaba metetba kisüng masü saka oset yanglurtem rongsenketzüng nunga tajangzüik tali agütsür, ta ashi.

Pa-sasa adokba aser nisungi yangluba oset North East nung talubosa lir, ta pai ashi.

Nagaland nung yangluba osettem alimai sapur. Saka tia maka item oset ya peria mali. Anungji State Sorkari state nung item oset ya jangjateta GI tagging atema inyaksüla, ta Governor-i ashi.

Iba sentong nung Chief Postmaster General, NorthEast Circle, Amitabh Kharkwal-i ashiba agi, GI tag ya kanga tongtipang lir, kechiaser iba ya ajanga temelaba makai register süa aliba GI osettem amshiba nungi nokdang.

New Delhi nung aliba National Philatelic Museum nung Special Cover ya ayutsü, ta pai ashi.

Postmaster General, North East-II Region, Som Kamei-i sentong nung melepzüng o jembia liasü. Iba sentong nung state sorkar nungfi ketdangsür, Raj Bhavan nung staff aser Department of Posts nungi arua dena liasü.

## Longleng nung SDGs indang district level workshop ka agi



DC indang Conference Hall, Longleng nung September 6, 2021 nü Building Capacities for Taking Forward the SDGs nung district level workshop agiba yangi noksa nung angur.

### Dimapur, Rongjui/Sept. 06

(TYO): Deputy Commissioner indang Conference Hall, Longleng nung September 6, 2021 nü Building Capacities for Taking Forward the SDGs nung district level workshop ka agia liasü. Iba sentong nung District Planning Officer, Longei Phom menden liasü aser sentong nung Deputy Commissioner, Superintendent of Police aser district sasep nungi department balala indang ketdangsürtem dena liasü.

Iba workshop nung technical session ana agia liasü. Mezüngbuba technical session nung SDG Officer, SDG Coordination Centre, Planning & Coordination Department, Abilo Humtsoe

ajanga Longleng District dak rangloker SDG localisation & integration indang onük nung jembia.

Lai SDG mapa kuma inyaksü atema national, state aser district sasep nung institutional mechanism aser tasa balala, SDGs achayangtsü atema District Indicator Framework amala indang lemsatapa liasü.

Laisa item indicators indang (North East Region SDG Index - Baseline Report 2021-22 indang shilem ka ama) lemsatep, koba Longleng district nung tajungba kuma renloksü nungdaka lir.

Iba sülen Interactive Session ka SDG Consultant, SDG Coordination Centre,

Planning & Coordination Department, Zitin Munshi lenisüba nung agia liasü.

Iba session nung Longleng district atema tapet department tem nung tongtipang mapa aser local level solution indang shisa lemsatapa liasü.

Iba workshop nung Deputy Commissioner, Longleng, M. Shayung Phom ajanga melepzüng o jembia aser tarutsü nükla yur Longleng renloksü atema SDGs ya kanga tongtipang lir, ta ashi.

Kasa district level workshop ya Kiphire, Noklak aser Tuensang district tem nunga agia liasü aser Nagaland nung tanüngba district tem nunga agitsü sentong lir.

## Dimapur district kübok polling station indang Draft list renemogo

Dimapur, Rongjui/Sept. 06 (TYO): Dimapur district kübok 1-Dimapur-I, 2-Dimapur-II, 3-Dimapur - III, 4-Ghaspani-I aser 5-Ghaspani-II Assembly constituency tem atema polling station indang Draft list renemogo aser adokogo, ta Deputy Commissioner & District Election Officer, Dimapur, Rajesh Soundararajan,

IAS ajanga sangdong ka nung metetdaksü.

Iba Draft list ya District Election Office, Dimapur nung office mapang arua reprangtettsü.

Iba Draft list nung tai aputsü mesüra metongshitsü lira September 17, 2021 tashinung metetdaksütsüla, ta sangdong ajanga ashi.

## 3rd Quarterly National Lok Adalat Sept. 11 nü alitsü

Kohima, Rongjui/Sept. 06 (TYO): 3rd Quarterly National Lok Adalat (People's Courts) sentong ya National Legal Services Authority (NALSA) kübok Nagaland State Legal Services Authority (NSLSA) ajanga district headquarters ajak nung September 10 nü masü saka September 11, 2021 nü amentsü.

Ibai 2021-2022 nung 3rd Quarterly National Lok Adalat alitsü.

District Legal Services Authority (DLSAs) ajanga District Court telungzüik nung Lok Adalat Benches 11 amenoktsü.

Iba dak sendakba nung NSLSA Executive Chairman aser Judge, Gauhati High Court, Kohima Bench, Justice Songkhupchung Serto den Member Secretary, N. Longshithung Ezung, NJS nungeri DLSA Chairpersons & Secretaries tem den tawa senden ka menogo aser DLSAs dang jelia mera agitsü aser bankers, insurance companies amala den senden mena Lok Adalat matongdang sentong yanglutsü ashi.

Maneni DLSAs dang MATC cases, criminal compoundable cases, Negotiable Instruments Act cases, matrimonial cases amala iba Lok Adalat nung mezüng

agitsü totuyuba agütsü.

Lok Adalat ya mangatetep ken o bendetratetba inyakyim ka lir, kong court of law nung anendaka aliba ken o mesüra pre-litigation stage nung aliba jembia tembanger mesüra tekeraba nung angateteper.

NLA ya quarterly basis nung agir aser iba ya ajanga state nung tesem ajungalen angati ken o angateteper.

Civil, matrimonial, MACT aser aibelen tilateri ken o alirtem (Pre-litigation aser pending) iba anogo arutsü akok mesüra anogo madongdang DLSA front offices, District Court building aser NSLSA member Secretary Office, DC Office Compound nung bener arua agütsütsüla mesüra 0370-2290153 ajanga tongteprateptsüla mesüra nlsa.nagaland@gov.in dangi email asütsü akok, ta sangdong ajanga ashi.

DLSAs shia indang disposal Data ya maneni State Authority indang web portal nlsa.nagalandgov.in nung upload asütsü.

July 10, 2021 nü 2nd Quarterly National Lok Adalat agiba mapang district headquarters ti nung ken o 38 benoka aliba nungi 24 angateteper liasü aser ibai sen 36,35,776 indang ken o liasü.

## Peren District Planning & Development Board senden menogo



### Dimapur, Rongjui/Sept. 06

(TYO): Peren District Planning & Development Board pur September ita atema Deputy Commissioner, indang Conference Hall, Peren nung September 6, 2021 nü mena liasü. Iba senden ya ADC Peren, K. Mhathung Tsanglao lenisüba kübok mena liasü.

Iba senden nung DPDB züngsemtemi Peren jila aser New Peren District Headquarters tsüngta lenmang tuluba kuma yanglushitsü indang tim mera agitsü atema temaba ketdangsür dangi abentsü lemtet.

Jalukie nung Sericulture Institute amenoktsü indanga iba senden nung benoka jembia aser board-i temaba ketdangsür dangi me yok tsüngta District Sericulture Officer, Peren dang

teinyaktsü tim mapatem inyaksü mepishitsü lemtet. Inter Departmental Tournament, 2021 indanga jembia aser tensa agi melara October/November ita amungtsü lemteta liasü.

September 16, 2021 nü STG indang workshop ayongzüka akatsü, ta District Planning Officer (DPO), N. Likao Kikon-i senden nung metetdaksü. Iba dak sendakba nung board züngsemtema iba senden nung arua adentsü ayongzüka liasü.

Gram Panchayat Development Plan kübok Village Poverty Reduction Plan indang presentation tatsüka ADPM (DMMU), Ruuvilie Kotsu ajanga agütsü.

Taruba DPDB senden nung Department of Land Resources ajanga par department inyakyim indang PowerPoint presentation agütsütsü nunglokja liasü.

### Manipur CM-i CHC Singhat nung hospital & special ward lapoktsü



Manipur CM-i CHC Singhat nung hospital & special ward lapoktsüba noksa nung angur.

**Imphal, September 6, 2021 (Agencies):** Hombarnü Manipur chief minister N Biren Singh-i CHC Singhat nung yipden 30 aliba hospital aser special ward lapoktsüogo.

Go To Hills Mission 2.0 kübok hospital aser special ward yanglu.

Iba mozü ki ajanga Singhat

nung alirtem kanga teyari angutsü, ta Chief minister N Biren-i ashi.

Tanü paisa ALS ambulances aser medical equipment lema agütsü.

Iba sentong nung minister Th Biswajit Singh, minister S Rajen Singh, MLA Ginsuanhou Zou, MLA & advisor to CM Sapam

Ranjan, chief secretary aser tanga sorkar ketdangsürtem aden.

"Go To Hills Mission 2.0 kübok 30-bedded Hospital aser Special Ward lapoktsüba atema pelar. Iba facility ajanga Singhat nung alirtem tajangzük tulu angutsü" ta Biren Singh-i Twitter nung metetdaksü.

### Assam sorkari Centre dang 'piggery sector' atema special package meshir

**Guwahati, September 6, 2021 (Agencies):** Assam sorkari Centre dang state nung 'piggery sector' maparen tajungba kümdaktsütsü atema special package meshiogo.

Hombarnü Union Minister for Fisheries, Animal Husbandry and Dairying Parshottam Rupala menden ser national level virtual meeting amenba sülen Assam agriculture minister Atul Bora-i iba osang metetdaksü.

"Assam nung tawa African

swine fever ajanga kongshi aser iba jagi Centre dang 'piggery sector' shia arudaktsütsü atema 'special support package' meshiogo" ta Bora-i ashi.

"Linük nung Assam-i No. 1 status atongtsü aser kilen lakh aika kümzüksü atema special package nungdaker" ta paisa ashi.

Assam minister Bora-isa Centre dang shirurutem atema Vaccine Production & Disease Diagnostic facilities lapoktsü teyari meshi.

"NE ajanga atema Vaccine Production Unit ka dang alibaji Veterinary Biologicals, Guwahati lir aser iba ya 1950 küm lapok. Ajisüaka, cGMP & FDA norms ama iba facility ajungkettsü nungdaker" ta paisa ashi.

Minister Atul Bora-isa Centre dang Assam nung Animal Husbandry aser Dairying sectors renlokdaktsütsü aser Centre sorkar indang scheme tem inyaktsü atema asüngdanga liasü.

### Meghalaya nung nisung 123 dak Covid-19 putet

**Shillong, September 6, 2021 (Agencies):** Hombarnü Meghalaya nung Covid-19 tashidak agi nisung asüba osang maliasü saka tesüiba ghonda 24 nung State nung nisung 123 dak Covid-19 tashidak tasen putet.

Tashidak tasen puteter densema Hombarnü Meghalaya nung Covid19 positive tejangja puteter 77,144 shi tuogo. Kasa mapang, Meghalaya nung nisung 253 shi taneptsü nguogo.

Parnok 253 densema

Meghalaya nung nisung 73,711 shi taneptsü angur asütsü.

Meghalaya nung iba tashidak adoker külen nungi nisung 1,329 shi taküm samaogo. Tang, Meghalaya nung nisung 2,104 shi iba wara agi shirangdar.

Deobarnü, Meghalaya nung nisung 4 shi Covid19 agi asü aser nisung 254 dak iba tashidak putet. Kasa anogo Covid nungi taneptsü angur nisung 222 shi liasü.

Honibarnü, Meghalaya nung nisung 350 shi iba wara nungi

taneptsü angur. Deobar aonung NHM Meghalaya data ajanga angazükba agi, tanü tashi Meghalaya nung nisung 13,54,948 nem vaccine agütsüogo.

Deobarnü, state nung nisung 176 nem vaccine agütsüogo, ta NHM Meghalaya data nung shia lir.

Vaccine agir 176 rongnung, nisung 150 shi arishi küm 18 tema aser nisung 20 shi arishi küm 45 nungi temapur liasü. Kasa mapang health care worker 3 aser frontline worker 3 nem vaccine agütsüogo.



Hombarnü Assam Jatiyatabadi Yuva Chatra Parishad (AJYCP)-i lungkak aitba sentong ka agidang tangokba noksa angur. Assam-Arunachal arrtsü anasa Gerukamukh nung 2000-MW Subansiri Lower Hydroelectric Project (SLHEP) yangluba anenang ta takhangba agütsüba sentong ka AJYCP-i Dibrugarh jila nung ayonga agi. (Dibrugarh, September 6)

### Tzü metsüng ajanga Kaziranga National Park nung shiruru 24 asü

**Guwahati, September 6, 2021 (Agencies):** Kaziranga National Park aser Tiger Reserve (KNP & TR) nung tzümetstung ajanga sama aotsüsa tia nung aliba (endangered) shiruru 24 süogo.

Tzümetstung lendong nung mesü (hog deer) 17, güntok 2, shitsü (wild buffalo) 1, mezü (swamp deer) 2, ngüm (python) 1 aser shingo (cap langur) 1 densema arem shiruru 24 asü, ta Kaziranga National Park ketdangsür kati ashi.

Tang tashi nung tzümetstung lendong nungi forest personnel-i güntok tebong chanu ka densema shiruru pezü kümzüka lir. Mihimukh tenem anasa central range arrtsülen nungi shiruru pezüji kümzü.

"Güntok chanu indang tetsü aoba tsüngsü meputet. Iba güntok chanu kanga dang tashimait aser aneplautsü atema Centre for Wildlife Rehabilitation and Conservation (CWRC)-i yokogo," ta KNP & TR ketdangsür kati ashi.

Taoba küm ama, tzü metsüng lendong ajanga world heritage site indang tesem shilem 70% shi konghshio.

"Tzü metsüng shilem timbaka arema aluba den, Hombarnü KNP & TR indang shilem 30% shi tzü agi metsüngba lir," ta ketdangsüri ashi

National Highway ajanga arem shirurutem Park telungi ayiba aser lenmang nung senzüsönbonger garitemi item shiruru dak memenüngtsü/ metsükoktsütsü asoshi Forest tekolakpur temi item shiruru senzüba mitdar.

Kaziranga nung tanga shiruru dak alaka, tezü ka aketba güntok (one-horned Indian rhinos) 2,400 dak tema lir.

Arem shiruru dak tsükoktsüba/menüngba aser yirutsüba nokdangtsü asoshi, forest aser district administration ketdangsürtemi akang akanga gari indang 'speed limit' aziöker aser iba nung aibelener tem asoshi temerenshi lir.

### Arunachal CM Khandu-i local oshi nung züluba textbooks sayatsü



**Bordumsa, September 6, 2021 (Agencies):** Arunachal Pradesh CM Pema Khandu-i Teachers' Day nung local oshitem nung züluba textbook 8 sayatsüogo.

"Oshi kümzüka ayubaji asen sobaliba aser tera wazüka ayuba lir. Asenok kong nungi aru ta asüba tera kodanga mamatsüla aser asen maitsü kümzüka ayutsüla" ta Arunachal Pradesh chief minister Pema Khandu-i ashi.

CM Khandu-i sayatsüba textbook temji- Nyishi, Wancho, Galo, Tagin, Kaman, Taraon, Idu aser Tangsa oshitem nung züluba liasü.

Taruba academic year nungi item textbooks ya upper primary schools nung third-language textbooks ama amshitsü.

"Asen lanur teimba kati kidanga pei tetsü oshi mejembir. Pei tetsü oshi nung textbook aliba ajanga parnoki oshi angazükba dang masü saka wazüka ayutsü. Asenoki wazüka meyura shibai iba

mapa inyaktsü?" ta Arunachal Pradesh chief minister-i ashi.

Item textbooks renema adokba atema CM Khandu-i kin 8 nungi Community Based Organisations (CBOs) aser State Council of Educational Research and Training dang pelaba metetdaksü.

"India nung oshi 600 tashi sama aotsü tia ka nung lir. Tesüiba küm 50 tsüngda oshi 250 jungnüa samaogo" ta Tangsa Script Development Committee nung vice president, Kamjai Taism-ia ashi.

sentong nungsa State education minister Taba Tedir aser secretary for education, Niharika Rai natia o jembi.

Arunachal Pradesh nung kin tongti 26 aser sub-tribes 100 tema lir aser kin shia indang oshi balaka lir.

"Asenoki oshi ajak wazüka ayutsüla. Textbook 8 sayaba ya iba mapa tenzükerba lir aser tarutsü nung tajangzük angutsü" ta Longding district nungi Wancho script promoter Banwang Losu-ia ashi.



## TIR YIMYIM YIMOBILEM (EDITORIAL)

DIMAPUR SANGTENNÜ, RONGJUI (SEPTEMBER) 07, 2021

### Menden agi masü, nisungi inyaker

**Y**imsüsüba aser ketdangsuba maparentem ajak nung menden balala shimteta lir. Itemji kar tera tilaba aser kar tera tuluba, anungji menden yariji mapaa lemezüksü aser mapa yari taa-a angutsü. Ajisüaka, kechi mapa lemezükdir lemezükaka, menden jagi inyaksü masü saka menden nung amensang jagi inyaksü. Aji oda, menden tajung aika renemtsüyongbo yangji amenertem dakji shisatsü aser temetetba melira, nübortem yarinüba aser jungdaksünüba tangatetba melira, pei akatsü masü nübortem kadaksütsü bilema inyaksü tejangraba melira nübortem tiabo tamajungba kumadoktsü. Menden dakji taküm mali aser shisatsüa mali, anungji marakzütsü aser tejembia mejembitsü. Mendenji kodanga nübortem alidaki maotsü aser nübortem tia mangutsü, kechiyong mendenji taküm masü. Aji oda, yimsüsüba aser ketdangsuba menden aser item nungji amenertem indang ya kodang asenoki tanü asen lima tia den medemdangdir, asenoki asen lima sünga yimsüsür aser ketdangser masü saka mendenang aika angutsü. Mendenji angati arur masü saka nübortem meyong sen agi yanglur aser yangji amenertemjia nübortem sen agi mesür. Ajisüaka, iba yariji menden nung amenertem nübortem nungdak apiteta mejembira aser meinyakra, mendeni mozü ki junga anepalutsütsüa masü, mendeni kaketreju tajungba mekümdaktsütet, mendenibo nübortem jajaba lenmang ajung asü majungar memetetsü. Aji oda, mendenibo lanurtem nungdak memetetsü, tantsür tambur aser tetsür tanurtem timtemba indang mebilemtsü aser menden den asenoki tarutsü Naga lima indang mejembitetsü. Tanü Nagaland merenloktetba aser küm shia sentsüh madak sentsüh bendenloka aobaji Nagaland-i yimsüsür aser ketdangser tajung züindaktsü masü saka mendenang aika kuma züindaktsüba agi, kibong nung mapa inyakerbo mali ser chiyongerang teimba akümba ama, peisasa pei kibong anepalu mesütet akümba timtem lir. Tanü Nagaland tatar senden nung menden 60 lir aser nübortem nungdak repranga anepalutsü asoshi department ishika tenzükba tangbo department aika kuma Secretary aser Director menden Nagaland nung masem kumogo. Aji oda, district asem agi tenzükba tangbo district-a 12 kumogo aser ano district tasen pungo akümtsü asoshi nübortemi takangba agüja lir. Iba jagi asenoki taoba hopta nung, tang nübortemi district tasen meshia aliba amaji state government-i agizük nunga koma süla (?) ta asüba onük nung bilemdangtsü atema mapang agiogo. Atangji, department ka agi ana asem kuma lemsaba aser district aika kuma aoba tetezüji nübortem tonga oagi anepalutsü asoshi menden talila lalokyonga aoba mapa asütsü. Aji junger. Ajisüaka, Nagaland nungbo Secretariat aser Directorate talila akümba agi mapa talila rateta tajungba inyaker masü saka office nung inyakerbo aika saka mapabo maka ta asüba tensa tia nung Nagaland kongrasüka akümba angur. Kasaji, district talila ka kümli, lenmang tamajungba kümli, ano district tasenba ka kümli nübortem nungdak mepriba kümli ta district talila kuma-kuma Nagaland nung kaketshisatsü aser taneptsü tajung angudaka maka, takar kar dak alaka, sensakertembo taküm tia tajungba akümer masü saka tamajungba kuma raksaba angur. Aji oda, asen lima nung department aser district talila kuma-kuma nübortembo alar jenjang nung lir, iba jagi metetsümonga nübortemi sensak marem pei temeten ayoker. Joko, Nagaland jungnura yimsüsüba aser ketdangsuba menden aika akümtsüba masü saka Tsüngrem akümtsüba aser nübortem meima ochishia aser nendaka inyakra yimsüsür aser ketdangser teimba-teimba adokdaksütsüba jiang senso shia khuret kuma inyaksüla. Tsüngrem tsübuba agi ochimashi mapa meinyakra aser nübör meimba agi pei ajangzüksü kisüng mebilemi inyakra yimsüsür aser ketdangser asenok rongnungi adoktetra, nübortem meyong rongsen aika yimsüsüba aser ketdangsuba mendentem meyushiba nung meindoki, menden tajung ishika nung nisung tajung ishika mener lirepatsüka nübortem anepalutetsü. Nagaland shirangba ya menden majungba aser menden agi meperiba agi masü, saka menden nung amenertem majungba agi shiranger. Aji oda, asen lima yanglushitsü asoshi menden dang nungibo nübör meimba ochishir aser temetetba shisatsü alir yimsüsür, ketdangser aser tenzükertemang tenungdakba kumogo.

## OLEMSABANG

### Democracy yimsüsüba yayim nung opposition ya tongtiret ka lir

~ L. Kika Pongener

India lima ya Democracy yayim agi yimsu asüba linuk tulutiba rongnung tanabuba lir. Mezüngbuba linukji United States of America (USA) asütsü. Aji oda, Democratic inyakyim nung Oposition ya tongtiret (Backbone) amai lir. Sorkar ketdangsuba aser linuk ka renlokba nung opposition-i shilem tuluka agir. Linuk ka nung sorkar rongsen ketdangsuba mapa ochishia ketdang asür asü masü (?) Terenlok mapa shitak inyaker asü meinyaker (?)...ta tsüngsu-pua/tenuk yoka anidaker opposition tashi-tait melira, yimsüsürtemi ochishia yimsu masütsü, yimsüsür temi ochishia yimsu mesüra linuk ka kodanga renloka tejakleni maotsü. Sorkar ka nung opposition malibaji linuk aser nübör asoshi takoksa ulura asütsü. Sorkar ka nung opposition malibaji sen rizüngdak Bank nung tanüker (Security) maliba den kecha tepila mali. Sen rizüngdak Bank nung tanüker melira, ochimashir atemabo ayung-ayunga kecha tetsübu-tarendak meli-i auyatetsü. Tanü putu nung linuk aika nung, sorkar teimba ka 'Corruption' agi sunger aliba tensa nung, opposition maliba sorkarji ochimashi inyaksüpur asoshi sadem-sademer asütsü, saka linuk aser nübör atemabo takoksa tulu asütsü. Tang ya asen Naga nung nübör ajunga mulungjang nung shisabulua bilembaji, temetongshitsür maliba sorkar ka jagi ochishia terenlok mapa inyaksü no (?)...ta arendaka bilemer. Tawa Kohima aser Dimapur nung Union Minister of State for External Affairs and Education, Dr. Raj Kumar Ranjan Singh arua Civil Society ajunga den Naga nung yimten tebilemtsü khuret indang sensaksema jajadang, pai osang bener dang kanga tongtipang o ka yamai ashiba züngshi, "Democratic inyakyim nung opposition-i nübör atema mapa tulu inyaker". Ano pai kanga tongtipang o ka ashibaji, "Nübortem aser linuk renlokdaktsütsü atema ajak longjembaji kanga junger, saka sorkar ketdangsuba meita reprangtsü atema opposition alitsüla". Atangji Union Minister Dr. Singh-i ashibaji kanga shitak lir, pai ashiba nungji tongtipang tangatetsü kaji, linuk renlokdaktsütsü, linuk nung yimjung alitsü, aser Naga yimten ken o tatemang telemtetba, 'Solution' ka bener arutsü atemaji linuk tenzükertem ajunga ka kuma longjemtsüla. Saka ano tip külen, sorkar-i ochishia terenlok mapa inyaksüba, terenlok mapa atema agütsüba senotsü shitak tim lenmang nung ochishia ketdang asür asü masü (?)...ta tenuk yoka/meita reprangtsü asoshi opposition tashitait alitsüla, tetezü...Rulling o opposition anaji balala aliba tajungba ta shinurba sudi. Shitakba shidi süra, Naga nung yimten ken o tatemang telemtetba kati arutsü 'Solution' atema lenmang sadema lapoktsüdi ta bilemra, rulling o opposition anaprongla nung MLA-tem ajunga 'Mass Resigned' sur Assembly menden tazüng toktsütsüla. Yamaji inyaktetra ajibo linuk aser nübör meimba Politician asütsü, saka 'Solution' meji opposition maliba sorkar ka akümtsü asoshi ka kuma longjemer ta asüabajibo, rulling o opposition na prongla nung tatartemji pei ajangzüksü, mesüra pei jenjang ajangtsü arishiba Politician amai nübörtem-ibo bilemer.

11th August' 2021 Tir Yimyim nung, Nagaland sorkar nung Drawing and Disbursement Officer (DDO) 42-i Pay & Allowances bill tiyazü yanglur Rs. 4.51 Crore agizük ta Controller and Auditor General (CAG)-i yimjak nung odi-odia kaktetsüba nübör ajaki züngogo. Aji oda, osang kaket nung iba osangji azüngdang nübör aika mulungjang nung tasüngdangba aika asüngdangogo. Aser idangji Naga nung nübör aikati pei pei mulung nung 'Opposition' lir-a iba tashi aibelener süra...!!! Opposition mali, tai apo'er mali, temetongshitsür shinga melira, ano iba dang nungi tali temulung ulua inyaksü masü no?...ta asüngdangogo. Ano CAG-isa, "Tesuiba Audit Report nunga DDO-i Pay & Allowances bills tiyazü yanglur sen agizükba metetdaksüogo, saka sorkari teinyaktsü tim meinyakra ajanga DDOs aser Treasury Officers-i sen tim mesui agizüka agir ta ashiba angur. Sürabangla, CAG-ibo aibelenbaji sorkar nem metetdaksür sernung, kechiba sorkar-i tim teinyaktsü meinyaki toktsü...!!!??? Aji oda, CAG -i kaktetsüba ama, DDOs 42-i tiyazü Bill yanglur sen Rs. 4.51 Crore agizükbaji shitak asünungbo, 'Foot Hill Road' atema yamai asatapa meyutsü iba sen Rs. 4.51 Crore-ji danga agütsü nungbo mapa kobateka inyaktetsü...??? Atangji, iba senji nübör meyong sen masü no ? Asen Naga nung tulurtemi iba amai ochimashi inyakra agi asen lima terenloktsü tim merenlok rajang akümer. Iba amai ochimashi inyakra angudang Nagaland sorkar ya kibur maliba sorkar ka ta ashitsüa kuma odagi. Shibai teimba agizüka chitetsü ta toktepba amai dang kuma odagi, kechiyong ochimashi inyakra metetdaksü yongjia sorkar-i kecha mashi toktsüba jagi ochimashirtemji tali temulung uludaktsür. Aji oda, sorkar nem metetdaksü yongjia kecha meshi-i toktsür...ta asüba nungji arokaroka shisadangtsüla ka lir. Tatishitsü agi... Politician, sorkar nung tongti tenzükertem tazüngbur aser talakbur ajak tangatetep nung inyakra ka asünungbo...Shibai shiba anema ola adoktsü ? Shibai shiba merenshitsü ? Ajiser, nübör meyong senotsü ochimashi achiba yimjak nung kaktetsür, osang kaket nung adokba ngur-a sunga, nübör kati ola madokba ya koda asü ? Kechiba ola madoker ? Supokrem agi tebang nembangtsü asü ? Tetsübu agi ola madokteter asü ? Tanü asen lima majungba ya sobaliba tamajung aika tentetba agi majunger. Sürabang tai apo'er opposition-a mali, nübör-ia ola madoker ta süra, nübör meyong senji kecha tetsübu/tarendak meli-i küshi-küshi auya-a chidaktsütsü asü...??? Asen lima jungnura ochimashi mapatem anema tasü-ita ola adoktsüla, supokrem nung malangtsüla, tanak dang tanak-a ta ashitsüla, temesung dang temesung-a ta ashitsüla. Tanü asen lima nübörtemi tajangzük dang penbuba/arishiba Politician masü, saka linuk aser nübör meimba Politician aginur. Tanü asen lima nübörtemi seplasepshiba Political Party masü, saka tensa tia ajak nung linuk aser nübör asoshi timtem arema, ochi jembia, marakzüi akang-akanga nokdakba Political Party aginer.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir**

## Chhattisgarh nung aliba police station ka nung pastor dak azük



Chhattisgarh nung Khristanem reshikangshiba dak sendakba nung September 2, 2021 nü Khristan lenirtemi district collector aser chief minister na nem temepishiba shidi agütsüba sülen tangokba noksa nung angur.

**Raipur, September 06, 2021**

**(Agencies):** Chhattisgarh nung aliba police station ka nung Hindu nung telok kati pastor ka den Khristan lenir ana dak azük; parnoki Hindu nungertem kangshia Khristan yimsü dangi meyipdaksür, ta tai tongloksü.

Hindu yimsü alia amangertemi Bhatagaon area nung aliba Purani Basti police station nung pastor ka aser Khristan ana dak azük.

Police-i ashiba agi, pastor Harish Sahu-i Hindu nungertem kangshia Khristan yimsü dangi meyipdaksür ta pa anema ken o agütsüba nung ajemdaker police-i pa police station-i jaoka liasü.

Pastor Sahu den Prakash Masih aser Chhattisgarh Christian Forum general secretary, Ankush Bariyekar nung police station tonga aruba mapang nung police station nung Hindu nung aika adenshia liasü. Hindu nungertem jagi Pastor Sahu dak azük aser iba video ji social media nung kanga prokshio.

Police ketdangser kati, "Pastor-i Hindu nungetem Khristan yimsü dangi meyipdaksür, ta Hindu right wing telok kati pa anema ken o agütsüba nung ajemdaker police-i pa police station-i jaok. Yamaji pa den Bariyekar aser Masih nung police station-i aru. Ajisüaka police station nung right wing züngsemtemi police

station house officer (SHO) telung nung par asem dak azük," ta metetdaksü.

Iba tatalokba sülen Bariyekar-i police nem ken o agütsüba nung ajemdaker Hindu nung aika anema ken o benokogo.

Osangbener den jembidang Raipur nung tongti putir, Victor Henry Thakur-i, "Yangi Khristanem anema inyakba kanga bulua akümba ya tebilemtsü tuluka kümogo," ta metetdaksü.

"Hindu alia amangertemi onoki kangshia Khristan yimsü dangi meyipdaksür ta tai tongloksür, ajisüaka parnoki kuli magütsüteter. Kuli lira linük temzüng nung ajemdaker inyaktsüla. Hindu yimsü alia amangertemi teka sangshitsüsa parnok nem shibai temeden agütsü," ta paisa ashi.

"Hindutva pusemba party Bharatiya Janata Party (BJP)-i state election nung tamakok ngua liasü aser sangküm küm tetenzüklen kidanger state Uttar Pradesh nung assembly election agitsü. BJP-i nüburttem nem agütsütsüsa parnok ket nung kecha mali, ibayongji parnoki telemsa adokdaksüner," ta pai metetdaksü.

Thakur-i ashiba agi, taoba hopta nunga state nung denomination balala nungi Khristan lenir 25-i state chief minister Bhupesh Baghel dang

state nung Khristanem kümzüksü atema inyakdaksüner, ta shia temepishiba shidi ka agüja liasü.

Osangbener den jembidang Chhattisgarh State Christian Welfare Society nung Pastor, Moses Logan-i, Khristanem maneni amakba ya shisabulu tuluka kümogo, ta ashi.

"Tang tashi nung Police-i nisung tenet puogo aser first information report [FIR] ka benokogo. Aiben police-i FIR benoktsü memelunger saka telok ana tsünga ken o angatettepa tembangdaksütsü meranger," ta paisa metetdaksü.

"Hindu yimsü alia amangertemi police station telungia iteta pastor dak azükba aser police-i ibaji menokdangtetba ajanga state nung tzüzüng-ozüng maliba asenoki jangjar. Police-i sensotem kümzüksüla, ajisüaka parnokia kecha mesüteter," ta pai ashi.

Taoba hopta nunga Chhattisgarh state nung Kabirdham district kübok Polmi yimdak Hindu nung aika adenshia Pastor Kawalsingh Paraste dak azük.

Chhattisgarh nung nütsüng million 23 lir, aser iba nungjagi nütsüng shilem 98.3 bo Hindu nung lir. State nung Muslim nung shilem 1 lir lir aser Khristan nütsüngbo shilem 0.7 dang lir.

## Papua nung rara ajanga Khristan 3,000 dak tema jenshiogo

**September 06, 2021:** Indonesia nung Papua region kübok sepaitem aser separatist telok ka na tsünga rara adokba sülen Catholic Khristan 3000 densema nisung 5000 dak temai pei ki toktsür jenshiogo, ta Arogo lenir kati metetdaksü.

Intan Jaya district kübok Bilogai nung security sepaitem aser Papua Independence Organization (OPM) na tsünga rara tenzükba sülen Khristanem densema nisung aika jenshiogo, ta Timika Diocese nung apostolic

administrator, putir Marthen Kuayo-i metetdaksü.

Telungpurtemi temelung melemi yimdaklar ka kasetba sülen anogo ana lir sepai ka dak injang khalokja yirutsüba nungi iba rara tenzük, ta paisa ashi.

Papua nung pei ki toktsür ajenertem rongnung nisung 600 shibo Bilogai nung aliba St. Michael Arogo Tenla ki moapu nung jenoka lir.

"Iba rara manener, anungji taruba anogo ishika tsünga ano Tenla kidang jenoker nisung timba akümtsü," ta

putirisa metetdaksü.

Yimtsüng asem nungi nisungtemi pei ki toktsür anasa aliba districts nung jenokogo.

"Onoki Tenla kima moapu nung jenoka alirtem nem chiyungtsü den nungdak balala agütsüdar, ajisüaka Arogo kobika tashi yaritetsüar mejangja," ta paisa metetdaksü.

Yimjung alitsü aser nüburttem takoksa mangutsü atema telok anapronglai tekaraba nung rara anentsüla, ta paisa ashi.

## ANO GO ABEN TSÜNGREM DEN

### Taküm Tasen

*Anungji nisung kar Khrista nung lira, pa tasen poktetba. Tejenbaji süiogo, ajiang, ajak tasen kümogo. 2 Korint 5:17.*

Yisu ne mulungi aitung ta asüngdangba agi na khristan ka maküm. Kodang na tanaben aso, na Khristan ka aküm. Yisui ashi, "Atangji Zünpung ni ne dang shidi, tanaben mesora, nisungi Tsüngrem yimli mungutetsü" (Yn. 3:3). Sarasadem ka ashiba mesüra yimjak nung telemtetba agiba mesüra telemtetba agi card ka sign asüba agi na mekümzüksü. Tanaben asoba agi dang aji inyaktsü akok. Tenyar Pauli ashir, kodang na "Khrista nung lidir" tejenbaji süitemer. Na tekümtet anguba anogo nung nai menaa aliba temenentem ajak adoker. Yirur na timtema aruba ajak tanebtsü angur. Nai tamakok ngua arua liaka temeim aser agizükba ne meyong akümer. Timtem tekangshi ajak joko mali moatsür.

Kari na tanela nung tanaben asoba tesüngmangtsüji nemea küm daksütsü ashiba nai angashitsü akok. "Tang na "Khristan süa nai tesüba nung kechisa ajangshia aru ajakji ajangtsü aser ibaji akoktsü mapang agitsü" ta mesüra, "Na tanaben asotsü akok saka maneni na temenen den rarateptsü, aser nai ne tashi mait nung takok angutsü ta yimlar.

Tebilemtsüji shibai na tanaben sodaktsür pa dangi asen taküm aotsü melen aseni merangba agi tanaben asotsü merangbaji lir. Na temenen nungi nüji akümtsü asoshi Laishiba nung tabensa kuli agütsübaji Yisu Khrista aser Tsüngremer chir asütsübaji teperi. Satani ibaji masü ta na mesüzüksü bushir. Shiba dang nai amangtsü?

## Haryana nung anti-conversion Bill renemdar: Manohar Khattar

**Chandigarh, September 06, 2021 (Agencies):** Hombarnü züngsemtemji IAS officer TL Minister, Manohar Lal Khattar-i, state nung tamangba yimsü meyipdaksüba nokdangtsü atema anti conversion ozüng final draft renemdar, ta metetdaksü.

Haryana nung BJP sorkar anogo 2,500 ajungbamong nung Chandigarh Press Club nung osangbenertem den jembidang Khattar-i, "Nüburttemi langka tai inyakba nokdangtsü atema ozüng yanglur. Haryana tesem kar nung item ama tatalokba lir," ta metetdaksü.

"Tamalenbo item ama tatalokba ya ka-ana dang liasü, ibayongji ozüng menügdaki liasü, ajisüaka tangbo mesüzüka tamangba yimsü meyipdaksüba kanga bulua atalokdar. Item ama tatalokba nokdangtsü atema ozüng nungdaker. Ibayongji onoki anti-copying Bill agizükogo," ta paisa metetdaksü.

Yaküm nungi state home minister, Anil Vij-i assembly nung Freedom of Religion Bill mesüra anti-conversion bill benoktsü atema jembia arudar. Item ozüng asadangtsü atema yaküm November ita nung

committee ka tenteta liasü aser iba committee nung züngsemtemji IAS officer TL Satyaprakash, IPS officer Navdeep Virk aser Additional Advocate General Deepak Manchanda nung lir.

Yaküm aser taküm na India kübok state kar nung anti-conversion ozüng benokba sülen Haryana nunga state sorkari anti-conversion ozüng ka benoktsü, ta sangdonga liasü.

Haryana nung Khristanemi iba ozüng benokba ajanga state nung Khristanem ano taliba reshikangshitsü, ta tsüba bilemer.

Tamalen osangbenertem den jembidang Home Minister, Anil Vij-i, state nung anti-conversion ozüng ka benoktsü atema pai ketdangsertem dang draft süang ta tuyuogo, ta metetdakja liasü.

"Iba ozüng benokba ajanga tashiyim amshia tamangba yimsü meyipdaksüba, mesüzüka tamangba yimsü meyipdaksüba, kibong akümba ajanga mesüra ozüng alema tanga lenmang balala ajanga tamangba yimsü meyipdaksüba nokdangtsü," ta metetdaksü.

**OLONG PAITEP # 5929**

1				2				3		4
5		6								
							7			
8										
										9
		10					11			
				12				13		
14										
							15			
16										

<b>TIPILEN</b>		<b>LANGTSÜNGLEN</b>	
2. Auo nung chiyongsü asenba	- (7)	1. Lenmang	- (7)
5. Mangyimba mapang	- (5)	2. Aor kidong ka tenüng	- (6)
7. O tamendakdak	- (4)	3. Tenarong maten	- (6)
8. Pei dak malangba	- (7)	4. A _ _ _ g	- (3)
10. Juli	- (7)	6. Mopung apodoka	- (3)
12. Sen ayudak	- (7)	ola adokdaksüba	- (3)
14. Tenük agi ajitet	- (4)	9. Tongtipang tagitsü	- (7)
15. Tamajung aküm	- (5)	10. Menungra bilem	- (6)
16. Apuso	- (7)	11. Aiür	- (6)
		13. S _ _ _ k	- (3)
		14. T _ _ _ r	- (3)

**OLONG PAITEP # 5928 TELANGZÜBA**

<b>TIPILEN :</b>	<b>LANGTSÜNGLEN :</b>
1. Yiar, 3. Tesola, 7. Yimra,	1. Yimti, 2. Amen, 4. Shiner, 5. Alaka,
8. Tangar, 9. Peria, 10. Tanur,	6. Satan, 9. Putet, 10. Tembar,
11. Tasen, 13. Lemjem, 15. Tambu,	11. Tatok, 12. Amang, 14. Jala.
16. Khuret, 17. Sang.	



**ALOKBAI POLITICAL PARTY TASEN KA TENTETER :**

**Alokba** : Pastorba, onoki ochishirtem telok ka atenshiar political party ka tenteta, Election Commission-ia temelaba agütsüogo, anungji nai sarasadem tajung ka agüjang ta arurba ya.

**Pastor** : Kanga junger, nenok party tenüngji kechi?

**Alokba** : Onok party tenüngji ACP ati, tetezü Anti Corruption Party.

**Pastor** : Kanga junger. Nenok Omen nungji ajemdaker kanga ochi shia inyangkama. Saka nisungerji kodang Yimten yimsüsütsü sabangji ngua Sapi (key) ji amoktsüdir idangjisa raksaadokerji kümdanga dang inyangkama.

**Alokba** : Aji küla laishiba nem dang len anidaktsütsü nung koda?

**Pastor** : Haija, oda ajia lidi, sarasademdi no!

Lilir : WhatsApp

**TANÜBO NAI LANGZÜANG**

Q. Tokyo Paralympics 2020 atema shiba India indang ken (theme song) mejemtsü?

A. Yogeshwar Dutt B. Deepa Malik C. Sanjeev Singh D. Varun Singh Bhati

————— (Taruba adok nung onoki langzüsü)

**YASHI ADOK TELANGZÜBA : 1881**

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Kuti**

(n) tuluka, aika (huge)

\* Arem nung ninang tesepe **kuti** ka tena liasü.

**Kutinemi**

(adj) onsara, tali ( very huge)

\* Tangar sem sempet **kutinemi** magütsüsüla.

**NAI-A YA METETTER MA?**

**ASÜR. SIDDHARTH SHUKLA-i SHILEM AGIBA MOVIE, TV SHOWS & SERIALS ASER PAI ANGUBA AWARD TEM:**

Aso: 12-12-1980 ~ Asü: 02-09-2021

**\* Movies**

2014 Humpty Sharma Ki Dulhania

**\* TV Shows & Serials**

2008-2009 Babul Ka Aangann Chootay Na

2009-2010 Jaane Pehchaane Se Ye Aajnabbi

2010 Pavitra Rishta

2011 Love U Zindagi

2012-2015 Balika Vadhu: Kacchi Umar Ke Pakke Rishte

2013 Jhalak Dikhhla Jaa 6

2014 Comedy Nights with Kapil, Jhalak Dikhhla Jaa 7

2014-2015 Savdhaan India

2015 India's Got Talent 6, Bigg Boss 9

2016 Fear Factor: Khatron Ke Khiladi 7, India's Got Talent 7

2017 Bigg Boss 10, Dil Se Dil Tak

2019 Kitchen Champion 5, Dance Deewane 2

2019-20 Bigg Boss 13

2020 Mujhse Shaadi Karoge

**\* Awards**

- Golden Petal Award for Most Lokpriye Face Male (2012, 2013)

- Golden Petal Award for Best on Screen Couple on Colors with Pratyusha Banerjee (2012)

- ITA Award for GRB! Performer of the Year Male (2013)

- Zee Gold Award for Most Fit Actor Male (2014)

- Stardust Award for Breakthrough Supporting Performance Male for the film "Humpty Sharma Ki Dulhania" (2014)

- HT Most Stylish Actor (2017)



**SUDOKU # 5970**

	7	8				5	1										
6		4		5	7	3											
					6		8	7									
		6			2	5											
		9				8											
				1	6	8			2								
	3	1		4		2											
4		2	3			7											
7	8			2					4								

**TELANGZUBA # 5969**

	6	8	9	1	3	5	2	4	7
2	1	3	7	9	4	6	8	5	
5	7	4	2	6	8	1	9	3	
7	4	8	9	5	1	3	2	6	
9	3	5	6	7	2	8	1	4	
1	6	2	8	4	3	7	5	9	
4	2	6	3	8	9	5	7	1	
3	9	1	5	2	7	4	6	8	
8	5	7	4	1	6	9	3	2	

**OJANG LUTEP # 5515**

SMOTEATÜ :

END :

EMANA :

RASE :

RISAHIA :

BAALI :

AKAJ :

ÜNGTSREM :

GINUN :

RLI :

**OJANG LUTEP TELANGZÜBA # 5513**

MAPA KOBABA SHITAK ASÜTSÜ TA RATAMA ALIDANG  
KECHA MESÜTET SÜIDAKTSÜ

**TAN HOPTA ATEMA - KOMA SÜLA ?**

Q. Nagaland angh R.N. Ravi ya melen nunga koma süla ?



Kerala nung Nipah virus putetba sülen September 06, 2021 nü Kozhikode nung Forest & Animal mongintemi lah dak nungi samples bendenba noksa nung angur.

### RAFFLE DRAW RESULT

#### Longjongkong Baptist Arogo

Golden Jubilee Planning Cum Fund Raise Committee  
In Aid of Fund Raise

11th June 2021 nü adoktsü aliba Covid-19 Lockdown ajanga thinena atar 3rd Sept 2021 nü adokba result: -

1st Prize - Sl. No. 114

2nd Prize - Sl. No. 1787

Consolation: 716, 1913, 1030, 1510, 1903

**SORRY FOR DELAY**

### LAND FOR SALE Old Showuba Area

- i) 5 Pura (Rs.90 per Sq. ft.)
- (ii) 14 Pura (Rs. 110 per Sq.ft.)
- iii) Diphupar B 10,000 Sq.Ft (Rs. 350/- per Sq.ft)

For more details contace 9856603713

## September 9 nü PM Modi leniba nung BRICS senden amentsü

**New Delhi, Rongjui/September 06 (Agencies):** Brihostibarnü Ato kilonser, Narendra Modi leniba nung linük pongu züngsema aliba BRICS senden amentsü, aser iba senden nungji Afghanistan tensa atema tongtibang süa jembitsü. "2021 küm BRICS summit nung India chair lir aser September 9 nü Ato kilonser, Narendra Modi mendenbuba sür 13buba BRICS Summit amentsü, aser iba senden ya online ajanga agitsü," ta Amongnü Ministry of Externatl Affairs (MEA) sangdong ka ajanga metetdaksü.

Iba senden nung Russia Tir, Vladimir Putin, China Tir, Xi

Jinping, South Africa Tir, Cyril Ramaphosa aser Brazil Tir, Jair Bolsonaro nunger adentsü. Tang agi tanabenbuba Ato kilonser Modi leniba nung BRICS senden amentsü. 2016 küm Goa nung ayongzükba BRICS senden nunga pa mendenbuba liasü.

BRICS züngsem linüktem-Brazil-Russia-India-China-South Africa ya alima nung terenlok aliba linük tulu pongu lir aser linük pongu nung ya alima nung aliba nütsüing shilem 41, GDP shilem 24 aser alima nung shishilembaba shilem 16 lir.

BRICS summit omenji 'BRICS@15: Intra-BRICS cooperation for continuity,

consolidation and consensus' asütsü.

India-i iba senden atema tongti onük pezü shimogo, aser itemji multilateral system, kiralongra anemba, SDGs atema digital aser technology amshiba aser nüburtem tsüngda tesendaktep lir.

"Item onük dak alia lenirtemi alima nung coronavirus wara densema regional aser alima nung tongti onüktem atema jembitsü," ta MEA-i metetdaksü.

Russia Ambassador to India, Nikolay Kudashev-i, iba senden nung Afghanistan tensa atema-a tongtibang süa jembitsü, ta metetdaksüügo.

## LS menden 120 anguba party-i opposition Front anitsü: Salman Khurshid

Opposition party temi aluyimertem Mahapanchayat pusem

New Delhi, September 06 (Agencies): Sangküm assembly election agitsü aliba Uttar Pradesh nung Amongnü aluyimertemi Muzaffarnagar district nung Mahapanchayat agiogo, aser iba sentongji opposition party aikati pusema liasü.

Mahapanchayat agiba sülen anogo ka lir Hombarnü Congress Party lenir, Rahul Gandhi-i, aluyimertemi tekong meranga takhangba agütsüba atema aluyimertem nem tenüngsang agütsür, ta metetdaksü.

Amongnü longkak aiter

aluyimertem nem Samajwadi Party office nung chiyungtsü agüja liasü.

Hombarnü Bahujan Samaj Party tongti lenir, Mayawati-ia mahapanchayat nung aluyimertemi Hindu-Muslim telongjem atema yimyim ayimba atema aluyimertem nem tenüngsang agütsü.

Rashtriya Lok Dal (RLD) aser Samajwadi Party (SP) lenirtemia mahapanchayat pusema liasü. Mahapanchayat sentong nungji party anaprongla nungjagi lenirtem sabang nung mamen saka party anapronglai longkak aiter aluyimertem nem tenüngsang agütsü.

Jayant Chaudhary-i aniba RLD party nungi züngsemtema

aikati ozülu balala amer aluyimertem pusema Mahapanchayat nung aden.

Osang angazükba agi, RLD tongti lenir, Jayant Chaudhary-ibo helicopter nungi aluyimertem dak naro paloktsütsü atema administration dang nungi temelaba meshia liasü saka administration-i pa nem temelaba magütsü.

Mahapanchayat ya aluyimertem union balalai akümba Samyukta Kisan Morcha (SKM)-i ayongzük. Yaküm November ita nungi aluyimertemi aluyimba ozüing tasen asempong agienang aser aluyimertem nem minimum support price (MSP) agüjang, ta takhangba agüja longkak aiter.

## LS menden 120 anguba party-i opposition Front anitsü: Salman Khurshid

**Kolkata, September 06 (Agencies):** Taruba Lok Sabha election nung menden 120-130 tashi ngutetsüsa aliba party ji Congress lir, ta Congress lenir, Salman Khurshid-i metetdaksü.

Congress Working Committee (CWC) nung züngsem, Khurshid-isa, opposition party tem, talisa regional party tem tsüngda telemsa aliba ajanga 2019 General election nunga BJP-i aniba NDA-i takok angu, ta metetdaksü.

Interview ka nung jembidang Congress leniri, "Kar lenir mesüra kechiba parnok lenir ama shimtsü. Opposition party tem rongnung menden 120-130 tashi ngutetsüsa aliba party ji Congress lir," ta metetdaksü.

Congress-i menden 240-250 shi nung BJP den kanga atongtepa tokteptsü, ta pai ashi.

"Party kobai menden 100-120 tashi ngudir iba party ji Opposition Front lenir asütsü. Menden ana dang anguba party kaji lenir masütsü. Lenir asütsü party jagi menden 120 bosa angutsüla," ta pai ashi.

Taruba election nung Ato kilonser, Narendra Modi anema nokdaksü atema opposition party kari Trinamool Congress tongti lenir aser West Bengal Chief Minister, Mamata Banerjee pusema dak sendakba nung tasüngdangba ka langzüdang pai, "Iba onük nungji kü tangatetba mali. Delhi nung kodang ajak ajurutepdir idangji parnoki jembitsüla. Ni Kolkata nung lia ni iba onük nungji kechiba jembitsü? Kari danga

menden 120 tashi angutsü asü? Congress-ibo menden 120 angutsü, ta ni bilemer. Kari danga menden 120 ngutetra pelaa agizüktsü. Iba atemaji shibai nokdang," ta ashi.

"Delhi nung opposition party tem senden amenba mapang nung shingaia shiba lenir asütsü, ta mesüok," ta pai ashi.

Taruba küm 10 tashi BJP sorkar maneni alitsü asü BJP sorkar agientsü, iba atemaji opposition party tem, talisa regional party temi telemtetba agitsüla, ta pai ashi.

1996 küm nungi 1998 küm tsüngda Congress teyari magii party tilatemi akümba United Front-i takok anguba dak sendakba nung tasüngdangba ka langzüdang pai, "Takok angutsüa akok, mesüra mangutsüa akok, ibaji ni meshitetsü. Delhi nung sorkar akümtsü atema menden 272 nüngdaker. Congress ama party kati menden 120-130 ngura asenoki (oppositon) külemi mener telemtetba agitetsü," ta ashi.

Election atema asalentong yanglur mongin, Prashant Kishor Congress nung adentsü asü, ta asüngdangba langzüdang pai, party nung telemtetba agiba temaba tentetji CWC lir, anungji Prashant Kishor party nung anioksü atema CWC-i telemtetba agitsü, ta metetdaksü.

West Bengal nung Congress-i TMC den lokteptsü asü, ta asüngdangba langzüdang pai, state units nung alirtem taginüba asadanga party anati telemtetba agitsü akok, ta ashi.

## India nung ano nisung 38,948 dak Covid putet aser 219 asü

**New Delhi, September 06 (Agencies):** India nung ano nisung 38,948 dak coronavirus putetba sülen tang tashi nungbo linük nung nisung ajak senteper crore 3.30 dak corovanvirus putetogo, ta Hombarnep 9:00 ako nung Union health ministry-i metetdaksü.

Tesüiba ghonda 24 tsüngda India nung coronavirus putetertem rongnung Kerala kija nungi nisung 26,701 densema liasü.

India nung ano coronavirus agi shiranger 219 süogo aser tang tashi nung iba tashidak agi shiranga asür ajak senteper lakh 4.40 dak tema jungogo.

Tang India nung coronavirus agi teshirangdakpur lakh 4.04 lir, aser ibaji coronavirus caseload nungi shilem 1.24 lir, ta Health Ministry-i metetdaksü.

Tesüiba ghonda 24 tsüngda coronavirus agi shiranger 43,903 anepogo aser tang tashi nungbo nisung ajak senteper crore 3.21 anepogo.

Tang hopta shia coronavirus positive putetba shilem 2.62 lir aser anogo shia positive putetba shilem 2.45 lir. Taküm January 16 nü India nung coronavirus vaccination tenzükba sülen tang tashi nung coronavirus vaccine dose crore 68.46 agütsüügo.



September 06, 2021 nü Odisha yimtiba, Bhubaneswar nung school züngtur alirtemi tatidang results nung ochimashi liasü, ta aija Chief Minister'er kidangi longkak aita aodang Police-i nokdangba noksa nung angur.

## Nepal nung tzümetzüng agi ki 380 dak tema metsüng bang



Tzünglu sashia aruba ajanga Bishnumati ayong nungi tzü muteta adoka Kathmandu, Nepal nung aliba dokan tem mubangba sülen Nepal nunger dokan kiburtemi molushi indokba noksa ka yangi angur.

**Kathmandu, Rongjui/September 6 (Agencies):** Nepal nung tzünglu kanga sashia aruba ajanga animesoba tzümetzüng nung Kathmandu temeket nung nisung aliba tesem aika raksatsüba den ki 380 dak tema metzüngogo, ta police temi Hombarnü metetdaksü.

Deobar aonung tzünglu kanga sashia aruba sülen Kathmandu kübok tesem 100 dak tema metsüng. Nepal police, armed police force aser Nepal army team balalai yasüng nisung 138 dak tema

kümzükgogo, ta metropolitan police office otongdar Sushil Singh Rathore-i ashi. "Mulpani settlement kübok Manohara ayong tzüküm, Kadagari, Teku aser Balkhu tesem nung tekümzükgoba maparen balala inyaka liasü," ta Rathore-i ashi. Kathmandu kübok ayong küm nung aliba tesemtem timba tzümetzüng agi kongshiogo. Kathmandu nung ghonda pezü tsüngda tzünglu 105 mm aruba ajangshiogo, ta ketdangsurtemi ashi.

Iba tzümetzüng lendong nung ki 382 metzüngbangogo, ta

metropolitan police office sangdong ka ajanga metetdaksü.

Tankeshwor, Dallu, Teku, Tachal, Balkhu, Naya Buspark, Bhimsensthan, Machha Pokhari, Chabahil, Jorpati aser Kalopul densema tesem aika tzümetzüng agi konshia liasü, ta office ajangsa metetdaksü.

Kasa mapang nung Deobarnü Okhaldhunga district kübok Betini yimtsüng nung tsüngi aiba sülen nisung tenet tashi yirua liasü. Tsüngi aiba lendong nung kia aika raksaogo, ta police temi ashi.

## Northeast DR Congo nung ADF telungpuri nisung aika tepset

**Kinshasa, Rongjui/Sept. 06 (Agencies):** Nüburtem animesüngzüki aliba Democratic Republic of Congo northeast tsütsü hopta tatemlen nisung tajemba agi 30 tepset, ta yangji alirtem aser UN osang ajanga ashi.

Ituri tesem nung Honibarnü iba lendong ya Allied Democratic Forces (ADF) teloki agütsü südi ta temolung melemteti lir, ta parnoki Hombarnü ashi.

Walese Vonkutu nung tekolakba, Dieudonne Malangayi-i mezüngbo nisung 14 asü ta ashi saka nisung tasümgang tali ngutet, ta AFP news agency ajanga Hombarnü ashi.

"Asürtem temang bushitsü aoba civilian temi arem nung ano nisung 16 temang ngutet, anungji civilian tem tepsetba ya 30 ajunger," ta Malangayi-i ashi.

US osang kati AFP dang iba lendong nung nisung tajemba agi 30 asü, ta ashi.

Nisung tasümgang bushir

civilian kati ashiba agi, asürtem ya timba nok agi lepset mesüra khasetba liasü.

ADF ta United States-ibo kiralongrar telok ka ta züngshir, aser ali rongsen peria aliba DR Congo anüdoklen telungpur telok jenti sadema senzüba rongnung parnok ya tamajungtiba, ta züngshir.

August ita iba telok yagi North Kivu nung aliba Beni tesem nung civilian 19 tepseta mi nung rongdok, ta yangji aliba ketdangsurtemi ashir.

Linük nung ADF yagi 2013 küm nungi tang tashinung civilian 6,000 shi tepsetogo, ta Catholic Church ajanga ashir, aser US nung amenoka aliba Kivu Security Tracker (KST) telokia 2017 küm nungi tenzüka Beni tesem kisüng nung iba telok yagi nisung 1,200 dak tema tepset, ta ashir.

Congo ketdangsurtemi ADF anema nokdakba nung "state of siege" densema lir, koba May ita tenzükg, aser iba mapang North Kivu aser

anasa aliba Ituri province nung ketdangsurtem ya sepaitemi melena liasü.

Saka "state of siege" ya tim masüba nung amshitsü, ta human rights telok temi ashir. "Emergency tashi ya tim masüba nung amshira meimchir temeden nung tali ang aibelentsü," ta Amnesty International ajanga May ita shia liasü.

Civil society activist temi iba ozüng ya agientsü akhanger, kechiaser sensopur temeden nung tali ajemshir, ta ashir.

August ita Tir Felix Tshisekedi-i US special forces dang Congolese army yaria ADF den raratsü mela, shirnok ISIL (ISIS) telungpur den sendaktepa lir südi ta amanger.

2019 küm April ita nungi tenzüka ADF temi amakba lendong kar ISIL teloki tenüng agia aru, aser taküm March ita Washington-i ADF ya ISIL den sendaktepa aliba kiralongrar teloktem rongnung züngoksem.

## Colonel Mamady Doumbouya-i anir Guinea sorkar atsüngogo

**Conakry, Rongjui/September 6 (Agencies):** Guinea military unit kati sorkar atsünga linük temzüng ozüng agintsüogo aser iba ajanga anüolen aliba Africa linük tamendakdak anokshitsüogo. Iba linük ya aluminium yanglutsü atema raw material supply asüba linük tongtiba ka lir.

Guinea indang special forces tekolakba Colonel Mamady Doumbouya-i sorkar atsüngba indang osang Deobarnü state television ajanga sangdong aser armed forces dang pa pusemtsü mepeshia metetdaksüogo.

Tir Alpha Conde lenisüba kübok Guinea sorkari senotsü meshidaki amshiba aser ochi mashi maparen balala inyakba anema iba jenjang agi, ta pai ashi. "Asenok lenmang, mozükitem reprangdangra asen saksalemtsü mapang tongogo, ta angateter. Onoki yimjung nung tashi melenteptsü atema linük ajanga nung sensaksem ka ayongzüksü," ta Doumbouya-i ashi.

Guinea ya China dangi bauxite supply asüba nung Australia den tokteper. Bauxite ya aluminium yanglutsü atema

amshir. Guinea-i taoba küm iba mineral ton million 82.4 supply süa liasü, ta sorkar data ka ajanga sayuogo. Supply ya timba China dangi yok koba alima nung aluminium timtiba amshiba linük lir.

Sorkar atsüngba sülen sepaitem yagi democracy benoktsü nangzük aser par sorkar ya The National Committee of Gathering and Development ta nüngja agütsü.

TV nung osang lemsatpeba mapang Guinean wako ka abener tanga sepaitem den Doumbouya-i o jembiba nguogo. Pai, "sepai ka mapaji linük kümzüksü atema lir," ta ashi.

Pai, Conde kong ali iba indang osang kecha magütsü aser arishi küm 83 tain lenir ya Deobarnü tatalokba sülen kong ali iba indang osang tejangja memetet.

UN secretary-general Antonio Guterres-i, Guinea nung sorkar atsüngba aitsüogo aser sorkar atsüngba telok dang parnoki pua aliba linük tir chioktsü mepeshia metetdaksüogo. "Koba sorkar südir süang prangbong amshia atsüngba ni aitsür," ta Guterres-i ashi.

## Japan nung Taro Kono-i PM Suga melentsü teimla angur



**Tokyo, Rongjui/Sept. 06 (Agencies):** Japan nung COVID-19 den raraba nung minister in-charge aser Japan ato kilonser asoshi nüburtemi sapua agizüksang, Taro Kono yagi party lenir menden asoshi toptepba nung tang yimsü tesüdak party nungi nübu tejangja kar teyari agitsü akok, ta broadcaster TV Asahi-i Hombarnü ashi.

Ato Kilonser Yoshihide Suga-i pa menden nungi alutsü, ta Hukulbarnü sangdongba ajanga yimten yimsüsür aser nüburtem aoksatap aser tang yimsü tesüdak Liberal Democratic Party (LDP) indang lenir September 29 nü shimtsü aliba nung tokteper aika kumogo.

Parliament nung LDP züngsem timba lir asünung, September 29 nü takok angusang ya ato kilonser akumtsü.

Tang tashinung iba menden atema tokteptsü nubi tejangja ji arishi küm 64 tain taoba foreign minister Fumio

Kishida kisüng lir.

Kono yagi tang tashi iba menden asoshi tokteptsü osang sangdonga mali, saka pa tejangraba lir amai osangtem ajanga ashir.

Taoba mapang defence minister inyaksang Shigeru Ishiba ya LDP züngsemtemi sapur saka pai Kono ang busemtsü bilemer, ta TV Asahi ajanga ashi, anungji Kono jenjang tajungba akumtsü.

Kono-i Japan nung vaccination drive indang Hombarnü osangbener senden ka nung jembiba mapang, pai party lenir menden asoshi metokteper nung ang tang teinyakdak mapa nung temolung agütsütsü, ta ashi.

Arishi küm 64 tain Ishiba ya party ketdangsurtemi nungiter aser taoba mapanga 2012 küm party lenir asoshi tokteperba mapang pai Shinzo Abe tsükdakja liasü. Saka ozüng yanglurtem kisüngi vote agütsüba mapang pai tamakok ajurua liasü.

## IN REMEMBRANCE

"I have fought the good fight, I have finished the race,  
I have kept the faith." 2 Timothy 4:7  
Great is Thy Faithfulness!

With thanksgiving, we reminisce the life of late N.I. Jamir,  
who passed away 25 years ago, on this day the  
7th September, 1996.

Even today, twenty five years after his death, we continue to hear of his far-sighted and magnanimous contributions in the development of the State, both economically and politically. His special concern for the erstwhile Tuensang and Mon districts and also his deep concern for the less fortunate members of the Naga society are still remembered. His single-minded and unselfish devotion to public service, without any care or concern for material acquisition or personal gain, was another hallmark of his personality. Above all, his God fearing nature, demonstrated in the many churches that he helped build and his support for pastors and missionaries are spoken of very fondly by many. No-one who came to him for help ever left empty-handed.

We are proud of the legacy he has left us. His children, in - laws, grand children and great - grand children bear witness that :

"The Lord is good and His love endures forever; His faithfulness continues through all generations."

Psalm 100:5

We praise and give thanks to our faithful and everlasting God.

Through this remembrance, we would like to acknowledge and express our gratitude to all who were closely associated with late N.I. Jamir during his life-time. We express our heart-felt appreciation for the continued support and kindness that have been extended to our family through the years. May the Lord bless and keep all of you under His grace.

The family members of late N.I. Jamir



## Nagaland atema SEIAA tentetogo

Dimapur, Rongjui/September 06, 2021 (TYO): Environment Protection Act, 1986 indang section 3 kùbok sub section (3) nung agüja aliba tashi amshia aser taoba Ministry of Environment & Forests ajanga September 14, 2006 nü sangdong ajanga metetdaksüba nung anidaka, Centre Sorkari October 20, 2020 nü Nagaland atema State

Level Environment Impact Assessment Authority (SEIAA) tentettsü osang metetdaksüogo. Iba committee nung züngsemtem yamai alitsü :-

1. I. Panger Jamir, IFS Retd PCCF and HoFF, Nagaland - Chairman
2. T. Yanger Ao, Retd Chief Engineer, Irrigation and Flood Control - Member

3. Addl PCCF (Environment and Climate Change) - Member Secretary PCCF aser HoFF, Upper Forest Colony, Kohima indang office nungi iba Authority maparen achaayangtsü. Maneni, tekalen agüja aliba sangdong nung metetdaksüba ama iba Authority ajanga agüja aliba tashitem amshitsü aser inyakyimtem nung anidaksü.

## Kangana-i Maharashtra sorkar dang theatre tem lapoktsü mepishi

Mumbai, Rongjui/September 06, 2021 (Agencies): Bollywood actress Kangana Ranaut indang taruba film 'Thalaivi' sayatsü asoshi ajaki yongya ataba mapang ka nung, Kangana-i Maharashtra sorkar dang State nung theatre tem tanaben lapoktsü mepishio. Thalaivii film ya taoba mapang Tamil Nadu Chief Minister aser actress J Jayalalithaa taküm otsü nung ajemdaker yangluba otsü asütsü. 'Thalaivii' ya Hokolbanü (10.09.2021) theatre tem nung sayatsü terenemba lir.

State (Maharashtra) nung Covid-19 wara ajema küma aoba nung ajemdaker, Kangana-i, "Mahatrashtira nung Covid-19 puteter ajema kümogo. Maharashtra nung #Cinema tem lapoktsü aser film industry den theatres business tem kümzüksü asoshi Maharashtra Sorkar dang

mepishir," ta tezüluba ajanga lemsatep.

Kangana-i tongti shilem agiba Thalaivii film ajanga Jayalalithaa actress ka ama industry nung inykaba aser Tamil cinema nung tongtibang nübu ka akümba den külemi State nung yimtenren tsütsü temelenshi tulu adokdaksütsüsa lai yimtenren wadang nung ajemoka shilem agiba indang otsütem sayutsü.

Tawa, Kangana-i, September 10 nü 'Thalaivii' indang Tamil aser Telugu version tem sayatsü asoshi Multiplex chain PVR ajanga temelaba agütsüba osang lemsatepa liasü.

"Tongtibang nisung indang film sayatsü asoshi Multiplex tem inyakyim/temzüng balala lir. Parnoki (Multiplex) Radhe film OTT aser theatre tem nung külemi sayaogo. Hopta ana tsüngda parnoki 'Master' sayaogo aser Hollywood movie

den US nung OTT ajanga film balala atonga sayaogo. Ajisüaka, Hopta pezü nung parnoki South indang THALAIVII sayatsü memolunger. Thalaivii ya ajaki yongya ataba film ka lir," ta Instagram sabang nung lai lemsatep.

"South cinema nung, Thalaivii film Tamil aser Telugu oshi nung sayatsü maangka anguba asoshi pelar, ajisüaka Hindi version sayatsü mapang agiba asoshi mepelar," ta PVR sangdong ka nung shia lir.

Thalaivii' film ya Vibri Motion pictures, Karma Media Entertainment aser Zee Studios den Gothic Entertainment aser Sprint films longjemer sayatsü. Iba film ya Vishnu Vardhan Induri aser Shailesh R. Singh den Hitesh Thakkar longjemer produce süogo. Kasa mapang, Thirumal Reddy aser Brinda Prasad nati creative producer ama iba project nungitogo.

## Pelaba Lemsateper



ASOBA : 20-10-1958  
ASÜBA : 29-08-2021

Onoki kotanga amatsü makokba asür Yimsüsür Mr.Chubalemba (Changtongya) pa shirangba anogo nungi tasüba anogo tashi kija aser kibong, tembar, kiyonger, arogo, yimten, lokti balala shirnokisa sarasadem, nübo, shisatsü aser rongsen agi ozü yaritepogo, nenok ajak dang kanga pelaba lemsateper. Nenok tangi arua meshitetaka asen Tsüngremi nenok ajak moajangma ta ozü sarasadem.

Temeim kinungtsü, chirnur, semchir aser kinunger.

## OFFICE OF THE WATSÜ TELEN ALONGKIMA TENÜNGSANG AGÜTSÜR

Wb. & Wt. Chujangrepba Ozüküm (Waromong), jala Kr. Merenkala Ozüküm, Graduate Teacher, GHS Alongkima, la-i District Teachers Award 2021 ngutetba atema asen Watsülartermi pelaba lemsateper.

Ano tarutsü nung nü tenzükba nung lanurtem tejakleni anir aotsü tulusang Tsüngremi moajangma.

Sd/-  
Amenia Jamir  
President, Alongkima  
Watsü Telen

Sd/-  
Tianaro Lkr  
G/Secy., Alongkima  
Watsü Telen

## Brazil aser Argentina na tsüngda asaya athi

**Rongjui/September 6, 2021 (Agencies):** Brazil aser Argentina na tsüngda Deobarnü World Cup qualifying asaya tenzükler mapang tatsüka tsüngda thitsü. Covid-19 inyakyim nung aibelenba atema iba asaya thia liasü. Sao Paulo indang Neo Quimica Arena nung linük ana tsüngda asaya tenzükler mapang tatsüka tsüngda Brazil nung health ketdangsürtem ground telungi aitba sülen asaya anena liasü.

Brazil nung health ketdangsürtemi England nung asayaba Argentina nung asayar pezü Covid-19 inyakyim nung aibelenba atema tangsa tang quarantine asütsüla, ta ashiba sülen ghonda ishika tsüngda iba ya ataloka liasü.

Brazil indang National Health Surveillance Agency (ANVISA)-i ashiba agi, Premier League nung asayar Giovanni Lo Celso (Tottenham), Emiliano Martinez (Aston Villa), Emiliano Buendia (Aston Villa) aser Cristian Romero (Tottenham) nungeri Brazil-i aitba mapang osang tai agütsü.

Romero, Lo Celso aser Martinez nungeri Argentina

starting line-up nung liasü aser iba ajanga ANVISA ketdangsürtemi iba jenjang agütsüsa aküm.

Asayar pezü yagi Brazil-i maru tsüngda anogo 14 jelia parnok United Kingdom nung mapang intokba indang osang tejangja magütsüba atema aitsü.

Iba atalokba dak sendakba nung Argentina captain Lionel Messi-i, "onok idaki arur anogo asembuba ser nung parnoki kechiba iba ya tangang inyaker," ta ashi.

Argentina coach Lionel Scaloni-ia, "parnok pezü masayatetsü ta onok dang khen danga mashi," ta ashi.

Argentina Football Association tir Claudio Tapia-i, asayartemi osang tai agütsü ta aitsüba magizüki, federation-i iba asaya atema FIFA tetuyuba ajak sülen anidakogo ta ashi.

"Teyazü jembitsü kecha lenmang mali," ta Tapia-i ashi.

Ajisüaka asaya anendaktsütsü atema telemtetba agiba atema Brazil nungeri ketdangsürtemi mesasar.

"ANVISA-i tetenzük nungi agütsüba tetuyuba sülen manidakba atema iba ya

atalokogo," ta ANVISA director Antonio Barra Torres-i Brazilian television ka nung ashi.

"Asayar pezü dang linüki meyipa meyok tsüngda lokti nungi pilaa alitsü tetuyuba agütsü, saka parnoki tashi manga. Parnok stadium-i ao aser asayaba moapuia ai, koba aibelen ka liasü," ta paisa ashi.

Coronavirus tashidak prokshia aoba nokdangtsü atema sorkari June 23 nü United Kingdom, India aser South Africa nungi Brazil-i arurtem nem tenokdangba agütsür lir.

Agency-isa, Honibarnü senden ka amenba mapang item asayartem ya quarantine asütsüla aser Deobarnü asaya nung shilem magitetsü ta shiogo, ta ashi.

South American football's governing body CONMEBOL-i, iba asaya thinenogo ta ashi saka asaya asayashitsü masayashitsü mesera telok ka nem takok agütsütsü iba indang osang tejangja magütsü.

Premier League nung asayaba Brazil nungeri asayar teku tashi parnok club temi ashishiba ajanga marutetsüsa akümba sülen iba ya ataloka liasü.

## ICC award atema Jasprit Bumrah züngoksemogo



**Rongjui/September 6, 2021 (Agencies):** India nungeri Bowler Jasprit Bumrah Hombarnü August ita atema ICC 'Player of the Month' asoshi züngoksemogo. Tang England den asayaa aliba Test nung bowling aser batting naprongla nung kanga junga asayaba sülen pa shimogo. Bumrah den külemi teburtem rongnungi England Test skipper Joe Root aser Pakistan pacer Shaheen Afridi na densema lir, ta ICC sangdong ka ajanga metetdaksü.

Tetsürtem rongnung Thailand tsür Nattaya Boochatham aser Ireland tsür Gaby Lewis aser Eimear Richardson na densema lir.

Bumrah-i England den mezüngbuba Test asaya nung wicket teku agi aser Lords nung asayaba mapang pai batting nunga teyari agüja Mohammad Shami den senteper run 89 yanglua liasü, koba India-i asaya akokba nung kanga tongtibang liasü.

Kasa mapang nung tasembuba Test nung captain Root-i kanga junga asayaa par telok takok dangi ani. India den tang asayaa aliba Test nung pai asaya asemprongla nung century kaka yangluogo.

Maneni Afridi-i August ita West Indies den Test asaya ana nung wicket 18 agi. Pai tanabuba Test nungbo wicket 10 agi Pakistan team takok dangi ani.

Tetsür asaya nung Boochatham-i Zimbabwe den asaya nung batting aser bowling naprongla nung lar team nem teyari agütsüogo aser iba ajanga la tetsür T20I player rankings nung batting, bowling aser all-rounder list nung tejkadangi tuogo.

La teyari tulu agütsüba ajanga Thailand team-i Zimbabwe den T20 asaya 2-1 agi akok. Ireland tsür Lewis aser Richardson nati August ita ICC Women's T20 World Cup Europe Qualifier nung Ireland team-i asaya asem akokba nung teyari agüja liasü.

Lewis ya Ireland tsürtem rongnungi T20 asaya nung century yangluba mezüngbuba asayar aküm. Lai Germany den asayaba mapang ball 60 nung run 105 yanglua liasü. Kasa mapang nung Richardson nem Europe Qualifiers nung Player of the Tournament naroküm agütsü. Lai batting aser bowling naprongla nung team nem teyari agütsü.

Lai asayamung tepeyong nung wicket tenet agi aser run 76 yanglua liasü.

## US Open 2021: Medvedev, Zandschlyp & Leylah quarters-i iogo

**Rongjui/September 6, 2021 (Agencies):** Russia nungeri second seed asayar Daniil Medvedev tang asayaa aliba US Open nung Deobarnü quarter-finals-i iogo.

Depbarnü asaya nung Medvedev-i British nungeri asayar Daniel Evans 6-3, 6-4, 6-3 agi koka tang agi pongubenbuba Grand Slams quarter tongtetogo. Medvedev shiba taküm Australia Open nung Novak Djokovic-i tsükdaktsü aser 2019 US Open final nung Rafael Nadal-i tsükdakja liasü, pai tang tashi nung asaya pezü nung set ka danga kokdakja mali.

"Teti atema bilemtetsü asoshi final tonga asayaner aser takümbo tajungba ka asütsü imlar," ta Medvedev-i ashi.

Quarter nung Medvedev, Botic Van de Zandschlyp den asayatsü shibai Argentine nungeri asayar Diego Schwartzman 6-3, 6-4, 5-7, 5-7, 6-1 agi koka liasü.

Kasa asayamung tetsür kija asaya nung 2020 US Open winner Naomi Osaka tsükdaktsüba sülen Canada tsür Leylah Fernandez-i Grand Slam asemben tashi koker alila Angelique Kerber 4-6, 7-6 (7/5), 6-2 agi kokogo.

"Ni kidang training agiba

mapang amshiba tasa ajak amshitsü merang. Parnoki kü dang point ka nungi ka asayatsü ashi aser ni yamaji asayatetba atema pelar," ta Fernandez-i ashi.

Osaka aser Wimbledon champion Ashleigh Barty na tsükba sülen tetsür asayartem rongnung top nine rongnungi tenetbo last 16 tongtetogo.

Fernandez, shiba Hombarnü küm 19 jungogo la quarter nung Tokyo Olympic bronze medalist Elina Svitolina den asayatsü.

Arishi küm 27 tain Svitolina-i, Simona Halep 6-3, 6-3 agi koka Grand Slam quarter-final tibuba tongtetogo. Svitolina-i Chicago nung WTA title k akokba sülen iba asayamung nunga kanga junga asayadaki.

Maneni Belarus tsür Aryna Sabalenka-i Belgium tsür Elise Mertens 6-4, 6-1 agi kokogo.

La taruba asaya Czech tsür Barbora Krejčíková mesera Spain tsür Garbine Muguruza den asayatsü.

Tebur kija asaya nungsa Spain nungeri asayar Carlos Alcaraz, shibai Greek nungeri third seed asayar Stefanos Tsitsipas tsükdakja liasü, pa tang mezüngbuba Slam quarter-final tongtetogo. Pai round pezübuba nung Peter Gojowczyk 5-7, 6-1, 5-7, 6-2,

6-0 agi koka liasü.

Alcaraz ya 1963 küm Brazil nungeri asayar Thomaz Koch sülen US Open tebur asaya nung Quarter finalist tem rongnung tanobusang asütsü. Pa quarter nung Felix Auger-Aliassime mesera Frances Tiafoe den asayatsü.

## Misbah-ul-Haq aser Waqar Younis nati coach mapa toktsü

**Rongjui/September 6, 2021 (Agencies):** T20 World Cup asayatsü ita ka dang lia Pakistan head coach Misbah-ul-Haq aser bowling coach Waqar Younis nati tena mapa toktsüogo. Pakistan Cricket Board-i

Hombarnü sangdong ka ajanga, Misbah aser Waqar nati mapa toktsüogo aser tena melena taoba Pakistan Test asayar Saqlain Mushtaq aser Abdul Razzaq nati coach mapa bena atatsü ta metetdaksüogo. September 13 nü taoba Test captain Ramiz Raja board mendenbuba asütsü shimba sülen iba ajungben telemtetba ya agia liasü.

Ramiz-i pa indang YouTube channel aser commentator aser analyst ka ama inyakba mapang Misbah aser Waqar na ya Pakistan team atema coach tajungtibabo masü ta shiogo.



Hombarnü sangdongba World Cup squad nunga Ramiz-i shilem agiba rebrangetogo, kechiyong pai T20 format nungbo lanur asayar aser power hitter tem asayadaksüner.

"Ni maneni ozü kibong nungi pilar bio-secure environment ka nung alitsüsa akümtsü aser ibayongji ni mapa toktsütsü telemtetba agiogo," ta Misbah-i ashi.

Kasa mapang nung Waqar-i ashiba agi, Misbah-i pa

telemtetba lemsatepba sülen mapa toktsü telemtetba agi, kechiyong tena külemi mapa agizük aser tang külemi anener.

PCB-i ashiba agi, Saqlain aser Razzaq nati New Zealand series atema interim coach mapa bena atatsü. Misbah aser Waqar na 2019 küm September ita shim aser tenangzüktepba yangluba kübok ano küm ka anunga liasü.

New Zealand team ODI asem aser T20I pongu asayatsü atema September 11 nü Pakistan tonga arutsü lia iba temelenshi ya atokogo. PCB-i ashiba agi, ICC Men's T20 World Cup atema team management mapangtong nung shimtsü.

### BILEMDANGANG

"Takok tangur dang ta mejangjaba ajanga aika tamakok angur."